

四庫全書

集部

欽定四庫全書

集部

王舍人詩集卷一

詳校官國子監司業_臣納麟寶

中書_臣劉源溥覆勘

總校官編修_臣王燕緒

校對官典簿_臣郭祚熾

謄錄監生_臣鄧友樞

欽定四庫全書

集部六

王舍人詩集

別集類五明

提要

臣等謹案王舍人詩集五卷明王紱撰紱字
孟端無錫人別號友石生又曰九龍山人洪
武中徵至京師尋坐累戍朔州永樂初用薦
以善書供事文淵閣久之除中書舍人卒於
官事跡具明史文苑傳集為其子默所編又

名友石山房稿前有曾榮王進序後附章炳
如胡廣等所作行狀墓表紱博學工書畫所
作山水竹石風韻瀟灑妙絕一時說者謂可
繼其鄉倪瓚其詩雖結體稍弱而清雅有餘
蓋其神思本清故雖長篇短什隨意濡染不
盡計其工拙而擺落塵氛自然合度周亮工
書影曰王紱詩畫雙美近見其詩集百餘篇
聲律不在高楊張徐之亞如舊業暫歸翻似

客異鄉重到即為家
通仙要得懸壺術
遺世聊存荷鍾風
草色池塘看細雨
杏花簾幕動輕寒
鄰家酒熟邀春社
釣艇魚來助曉餐
鳥從萬木陰中響
人在亂山深處行
皆對偶精工意新
而調逸絕句題靜
樂軒云前溪水泮
綠生波好雨催花
向晚過宿酒未醒
眠未起半窻紅日
鳥聲多竹几藤床
小硯屏薰風簾幕
篆烟青間齋幾日
黃梅雨添得芭蕉
綠滿

庭秋聲早已到梧桐露氣涼生湛碧空獨倚
闌干待明月紫簫吹散玉樨風斗帳藏春日
醉眠靜中惟與懶相便尋常甲子無心記看
得梅花又一年又畫竹寄友云我昔尋君扣
竹扉醉中曾寫竹間詩別來幾度空相憶多
在青燈聽雨時不獨筆墨工竹石而已此孟
端之畫所以貴重於後世也蓋其集傳本頗
稀故亮工錄其佳句存之其品題頗允至都

穆南濠詩話獨稱寄別娶婦者一絕則倉父
面目不足以見級之長矣乾隆四十五年正

月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

藏板

提要
卷八

王舍人詩集原序

故中書舍人毘陵王君孟端自少以聰敏聞好讀書喜吟詠尤工山水墨竹中更多故厄窮連蹇於羈旅道路之間者十有餘年其後乃用薦以善書選入翰林者又十餘年始得拜官未幾遂以疾歿於北京之官舍嗚呼其命矣夫君為人負氣節狀貌奇偉襟懷灑落其平生於人無所屈雖工於畫遇知己輒縱筆揮灑無所怙往往至於入神造妙有不可於意或非其人輒白眼相視

至詬詈弗顧其為詩觸景撫事即形之於言隨其興之所至情之所發初不計其工拙而自合矩度其所著凡若干篇君沒若干年其長子陰陽訓術默持以至京師請余為序嗟夫詩之道大矣以其時之高下世之治亂而音調見焉是豈細故也哉古之人常因此以觀世道尚矣君之生也幸際國家無事泰平之時以得有官於朝假之以年則其惕厲奮發於和平之音以鳴當世之盛者宜何如其至耶惜其僅止於此也君諱紱孟端其

字其別號曰友石生又曰九龍山人云永樂二十年壬寅秋七月下澣翰林侍讀學士奉訓大夫兼修國史廬陵曾棨書

士君子以一長擅名於世必其苦心焦思用志不分乃能超出凡庸而造夫微妙其有不經思慮而奇絕卓異者則又天資之美學力之至而非偶然也無錫王君孟端自幼負瑰偉之材遊學邑庠時鄉之先進若四輔官周士平侍讀學士王達善長史錢仲益教諭呂志學引禮

舍人浦長源輩皆以詩著名於時孟端窮經之暇每相
過從倡酬賡和甚為諸公所稱許尤善於繪事長江遠
山叢篁怪石隨意所適無不妙絕字書深得鍾王筆意
雖兼衆長然當揮灑吟詠之際援毫立就未嘗見其凝
滯也後被逮屏處邊陲十有餘年而寓物寫懷發於詞
翰意趣益工以知者薦授中書舍人玉堂儒碩咸器重
之永樂丙申以疾卒于官舍其子默裒輯遺藁得詩若
千首彙次成帙題曰友石先生詩集將壽諸梓求余序

之余自弱冠與孟端交處雖中更契闊後復同仕朝著
情好尤深今孟端不可復作有子表章其所著述以傳
於久遠可謂能繼志者矣茲承其請寧可以蕪陋辭余
聞詩以理性情貴乎溫厚和平固不以葩藻富麗為尚
也今觀集中長篇短章春容爾雅無斧鑿痕而理趣兼
至蓋其心志坦夷故詞語渾成而不假於雕琢也然非
學識之超邁曷能臻於此哉孟端名紱友石蓋其別號
云洪熙元年龍集乙巳仲春朔日翰林院侍講承直郎

吳門王進汝嘉書

欽定四庫全書

王舍人詩集卷一

明 王紱 撰

白華美孝子也

彼白者華維色之潔彼美君子修德孔哲修德伊何欲
親之悅 彼白者華維色之純彼美君子修德孔仁修
德伊何以安厥親 厥親在堂既悅且安旨酒稱壽室
家相懽朝夕在斯外慕曷干 君子之行莫先乎孝是
曰順德有裨名教子孫百世是則是做

白華四章章六句

瀨水美仲琰也史仲琰能紹先志故美之

瞻彼瀨水其流湯湯有美君子築室于傍厥心孔臧受
天之祥 瞻彼瀨水湯湯其流有美君子築堂于丘厥
德允修受天之休 有澤可漁有丘可鋤我堂我居先
人之廬我樂我志先人之書 惟爾先哲積善有基一
於為善而無自欺爰及後昆及慶之餘 後昆振振德
鍾於門繼爾先志此心常存勗哉敬哉薄俗斯敦

瀨水五章章六句

雜詩

鴻鵠志四海燕雀賀欄端四海一何遠欄端亦以安扶
搖豈不慕跡拘諒尤難鍛羽喧朝景安得追風翰俛啄
蕭艾間仰視天風寒斯舉咫尺足何必萬里搏撫已宜
自養勿多身外干

其二

志鬱食哽咽情懼酒忘醉如何飲食間憂樂竟莫類達

人無不可一以理自會時序侵燠寒晨昏互明晦苟能
守吾中外患亦何慙忠信與篤敬乃足寡尤悔賢哉子
張紳吾當永為佩

其三

秋旦露氣白初陽淡無暉羣雞正亂叫棲禽猶倦飛我
行適中野躑躅烟路微蒼莽荊棘深零露霑裳衣去去
既寡懽惻惻中心違素志諒難易知音古尤稀側身復
惆悵拂旦吾當歸

雜詩

楚人獻奇璞號泣足見傷宋愚得燕石什襲固以藏至
寶終自白瓦礫歸糞塲遭時自重輕沒世誰短長儀秦
乃赫赫孔孟徒遑遑仁義信迂濶功利足富彊舉世已
如此念之熱中腸

其二

雅樂古而澹其如世不好鄭聲何浸淫四座舞且蹈感
慨既異致善惡難類報禰天苦幽玄紛紛媚於竈所享

苟非誠罪福恐顛倒立身豈無術理物良有道曾聞舜
干羽苗格罷征討

其三

淒風西北來時序屬秋暮林野何蕭條草木怨霜露霜
露亦何心大化運行故須臾屆嚴冬堅冰日凝沍蛟龍
已沈淵蟄蟲亦坏戶塗我林下屋裂我機上布陽春望
望遙薄言善調護

訪陳羽士道寧因贈

我生樂夷曠幽抱常沖虛偶客京華塵不異林泉居時
來訪仙侶相與論道書凝神入無象妙觀天地初物我
既莫立孰謂形迹拘吹笙碧桃春天風動霞裾孤雲度
碧落六合乃吾廬出門感羣動役役將何如

雜詩

客有三代器寶之金玉重考制謂尊彝求形類餅甕文
欵隱斑駁光潤豈磨礱所嗟去古遠未足適時用什襲
雖珍藏棄置相伯仲縱有好奇者相看為玩弄

題悅心卷

人生貴有養所養將如何惟以養吾心一善靡有他倪
仰苟無愧靈臺藹天和嗤彼夸毘人嗜欲何其多所養
亦以異紛紛蹈風波仁義譬芻豢千載吾師軻

公子得野鳥

公子得野鳥來自虞羅中羽毛何燦燦聲音復噉噉珍
愛日為翫殷勤貯雕籠雕籠豈不貴勝彼荆棘叢飲啄
就左右乃足安微躬野鳥性難馴飛撲尤忡忡比類忍

莫同永隔雌與雄孰知野鳥苦祗悅公子容

為翰林典籍沈民則題樂琴書處

沈君構華軒藏書復藏琴書以載古道琴以傳古音古
人不可見唯此悅我心我心既自悅外慮俱銷沈涼生
深竹淨日轉高梧陰絃誦苟世守奚須滿籛金

送楊得昂

諱僂號靜約
鴻山鉅族

我適桑乾歸君猶五溪去飄流若萍蓬何繇復相遇迢
迢江上山歷歷煙中樹後夜月明時相思渺何處

其二

數載不相見一見驚復喜
翻思兩地情音問隔千里
宿雨暗洲渚飛鴻度江水
孤棹即飄然離愁又重起

題秋菊軒

九月霜露零我氣亦云肅
草木盡凋瘁而有籬下菊
粲如有情盈盈抱幽獨
我欲餐其英采之不盈掬
呼兒具雞黍白酒正可漉
素心二三人於焉敘心曲
陶然付一醉萬事亦已足
詠歌柴桑詩千載有餘馥

瞻雲軒

慈顏日已衰遊子日已違路阻千里脩心逐孤雲飛雲
飛想其下輕陰覆庭闈何繇獲終養日舞斑斕衣王事
靡有程歲徂曷言歸望望徒自傷暮景西山微

為張生寫竹

思安登永樂壬辰進士
陝西憲副卒年七十九

生也纔弱齡骨氣已拔俗青衿三尺強對客瑩如玉頗
亦好清事揖我求寫竹我方困塵途懷抱苦煩燠翰墨
交久違硯破筆已秃憐渠意甚勤聊為掃新綠生能會

我心進益必宜篤切磋與琢磨更請歌淇澳

味易齋為周叔訓賦 傳

厚味人所嗜子獨味於道味道夫如何義經日窮討大
而天地外細則秋毫杪所遇各有味咀嚼期了了至味
不可言惟應自知好非苦亦非甘忘飢復忘飽澹泊養
吾神泰和沃吾抱長年味斯味兀兀不知老掩卷坐忘
言見此庭前草晴光宿雨收遠色連天杳咄彼芻豢徒
胡為養其小

澹雲巢

大學士黃若嘗命僕作澹雲巢圖為其尊翁諱性字思恭先生壽復徵詩遂賦

有客居東山結廬山之隅林深藹芳潤清陰闕庭除泊
然入無倪與時相卷舒自名澹雲巢其志將焉如雲以
願從龍巢以產鳳雛及茲際昌運嘉應良不虛鳳既上
阿閣和鳴向朝曦雲乃爛碧落昭回五綵垂詎學巢與
由負此唐虞時

寫墨竹與蜀府明長史贈別

相逢意方洽相別情尤難殷勤欲有贈唯此青琅玕矯

矯蒼龍姿濯濯丹鳳翰稟茲拔俗韻高拂青雲端願言
君子心冰霜同歲寒

寫竹贈王孟彬紀善

昔我王子猷襟懷澹而沖獨結此君好彌久情愈隆不
可一日無珍愛金玉同有竹輒宜造肯令通主翁我亦
抱茲癖豪纁托幽叢遐躅邈難繼與君挹清風

寫竹寄贈顧教授祿謹中

秋聲起巫峽暝色迷湘渚悵望千里遙佳人渺何許幽

期邈難值欲往延佇中夜獨遐思西窓颯然雨

寫竹寄琴士張逢吉

美人昔相見為我鳴瑤琴初彈別鶴怨復奏孤鸞吟掩
抑弄餘意華堂夜沉沉涼月照綺席雲颺度瓊林一與
美人別令我憂思深塵囂日盈耳何繇滌煩襟我欲裁
嶰谷遠諧美人心六律既已調噓陽翕羣陰美人如見
與先此通微忱相期洞庭野共奏鈞天音

題成趣軒

桑麻日已長稼穡日已成門巷陰榆柳隔屋縑車鳴生
平寡營為遂此田園情衣食苦不乏公賦尤寬平舉家
情欣欣澹然忘世榮力作雖云勞濁酒時共傾豈意事
高尚所樂安吾生

盆裏黃楊

黃楊乃嘉植岷蜀多產之喬柯起百尺小榦猶拱圍作
器不沾垢櫛具尤其宜故人有好事全株遠相遺厥高
僅盈咫徑不踰分墮置之首宿叢何繇別竒姿況茲種

來久十易寒暑時顏色固自好長茂何遲遲賦性恐或
異雨露寧有私曾聞厄於閨此理疑見欺水土託盆盎
滋養良可知嗟予久寂寞對此心神怡親之若賓友愛
護如嬰兒清晝置書几良宵露堦墀時時為濯洒元氣
猶淋漓叢葉藹芳潤孤根尚撐支願言保貞操與世相
推移材良名斤斧曷用昂霄為唯應處巖壑庶可全天
資

題清適軒

脩鱗泳深淵勁翮凌遙空命分不可易出處諒難同達
人會斯理委順安厥躬外嗜既莫奪襟懷澹而冲蔡君
夷曠士養素烟霞中軒居面湖水几案羅羣峯開樽待
明月展席延清風心閒體常逸神完氣彌充惟以適所
適寧煩計窮通咄彼夸毘人冒進何忡忡患得復患失
冰炭交心胃悵然慕高躅無繇得相從

琴室為林典樂賦

楫間揭寶翰床上橫玉琴對客未成弄令人先斂襟地

位近彤郎門逕幽且深
瑤草露盈砌琪花香滿林
應知月明夜時有鸞鳳
吟我來偶相訪簾垂晝沈
沈為鼓一再行宛見名軒
心靈飈度餘韻祥烟散微
陰氣和體自適神靜心愈
欽曲終莫敢問訝是鈞天
音

送闕秀才歸江右

京國久為客悵然懷故山
孰云乏知己念親已頽頽
窮居恥明時曠懷良獨難
因思衣錦榮何如綵衣斑
空江一鳥度遠道孤舟還
分手復延佇極目蒼茫間

送端木員外孝思養病歸溧上

諱智南昌人善草書

都門已設祖冠蓋聚朋儔讌別未云已騶從羅道周大
夫何賢哉寵被君恩優為郎列仙署弄翰登瀛洲內帑
出賜衣大官具時羞虛懷戀闕心補報嗟無由奈茲抱
病質霜髯颯已秋上疏得優許養痾還舊丘舊丘況京
甸咫尺溧水陬依依農圃鵲鵲桑柘稠顏齡尚可駐
餘生得安休悠然遂高志那復生離憂於時正陽月霜
寒水痕收飄飄遠空雲浩蕩滄波鷗私懷徒嘆羨逸駕

安可留

題梅花

結心已鐵石陽春忽先布發此瓊瑤英寧能慮霜露澹
然絕世紛幽人雅襟度何如洛陽花池館資貴富姚黃
與魏紫綺麗相誇妬春風闕重局車馬日馳騫遂令貧
者心對酒起遐慕乃知遊冶人誰復重貞素流漸古碣
春殘雪空江暮清香不自知豈意人相顧

題靜庵卷為黃學士乃尊作

性字思恭

永樂有高士簪纓舊名門者年際昭代有子承君恩絲綸慎所職密勿居詞垣贊襄竭忠蓋惟思濟元元先生遂高志悠然樂田園種植森且繁芝蘭滿階軒沖懷澹無慮隱几時忘言山光散餘靄水色明朝暎自得靜者妙豈云厭塵喧賜金屢歸奉日以供盤飧時時叙隣叟倒此花下樽酒酣念恩澤一一相與論中心增感激永矢惟弗諼嗟哉靜中意乃有仁道存高風振千古里俗應彌敦

代作送卓民逸歸淞東迎養

憐君憶親苦我亦別親
久千里隔庭闈孤雲幾迴首
君今得歸省而我尚株守
惆悵送君行潸然淚盈手
春潮淞水船夜市蘭陵酒
到家春未闌園林正花柳
風飄菜子服盃獻蟠桃壽
此志君已遂此樂我何有
我亦欲效君未卜如君否

題思本堂

吳元凱求

吳生故鄉來相見出詩卷
自言構新宇思本揭堂扁
所

哀怙恃恩造物苦多舛存亡既莫及罔極情難展徒懷
風木悲對客淚常泣願言求名筆幽光庶揚闡時時一
披覽或俾哀悰遣嗟余久淹泊名卑材復謏拒生固辭
謝再四終難免嗟哉吳生賢所志匪浮淺能存孝悌心
悖理固應鮮惟恐人弗思能思即為善況復思務本本
厚支自衍慎勿事虛文浮華肆誇演慎勿無益思戚戚
徒悲恤所貴在立身名揚身益顯殷勤為生言進善當
自勉

蔡芝林為蔣公進求畫扇遂題

芝林字元鼎

蔣君我未識好事能延賓從游蔡夫子是可知其人謂
我隘而介傲兀長居貧尚耽山水癖豪黷掃嶙峋一介
不以取尤難輒交親片紙疇可得吾將永為珍夫子為
之請一一重具陳仍持君扇來求寫湘江春我方習吾
靜天游浩無垠適聞夫子言笑落頭上巾丈夫貴知己
誼合情便真苟能志吾志寧謂非吾倫況聞君遠祖三
逕招隱淪清風千載餘遐躅君能導瀆筆一揮灑脩脩

見霜筠交加林影間團團月如銀時方涼雨歇齋居絕
纖塵緬焉懷二仲安能與之隣擲扇返夫子衣袂凌風
振為我先謝君美酒宜多詢秋高月明夜直造君寧嗔
呈太常少卿雲巖先生

高巖何巍巍卿雲日復聚孕秀鍾奇才靈氣藹寰宇已
聞追夔龍詎肯效巢許文章翊昌運禮樂佐明主陽回
棘寺春月滿齋宮午尊榮位崇秩學力在稽古自憐牛
馬走質凡性尤魯雖懷問學心碌碌庸足數徒切瞻仰

牆無由造堂戶居然成涸鱗久矣困焦土願公巖上雲
化作天下雨

寫竹贈廖紀善

霜風動高秋草木抱悽惻唯此幽篁枝含翠終自得虛
心養直氣勁節凌寒色持以贈君子願言崇令德

為姚生題終養堂

姚生美昆季孝養怡親顏嘉味極甘旨彩衣舞闌斑慈
烏堂下啼斜陽薄西山所思得終養區區百年間百年

復能幾離會尤相關來日良可愛去日難再還美哉孝
子心及時常追懼嗟予命獨舛怙恃早已艱何繇奉百
年未得供一餐因君欲題贈使我摧心肝

題萬安山樵

山高樵徑險山深樵徑迂采樵雖云勞覽勝尤足娛飛
泉落林杪好鳥鳴丘隅歌逐天風還身與閒雲俱日夕
行負薪烟深望吾廬得失既莫較孰知賢與愚嗟哉朱
買臣富貴將焉如

題義方書舍

我昔童州時蒙養絕浮靡朝夕常趨庭頗解學詩禮奈何纔弱冠早已失怙恃誨言何繇聞定省不復理徒懷風木悲沒齒殊未已及余生兩雛將以托宗祀既欲承箕裘當令業經史無何我多故謫戍向邊鄙迢迢父子心隔越數千里惟恐有存歿不暇較賢否漂流無定居歲月動盈紀幸余初還家無恙共驚喜踉蹌拜我前並立肩可比弱質雖成人愚騃誠可恥大兒僅識丁唯足

代耘耔小兒復癡頑真乃豚犬耳近令親筆硯十日書
一紙我欲痛責渠隱忍輒中止吁嗟我平生父子乃如
是邢君義方訓諸郎盡賢嗣芝蘭滿階庭玉樹映屏几
歲時行具慶稱壽羅拜跽嘉賓每過從迎立具甘旨傳
家務淳厚動必蹈前軌瞻彼天倫間藹若和風裏椿桂
同敷榮雨露光蕤蕤緬懷燕山實今昔良可儼所云積
陰德諒亦自茲始推此家政齊可致風俗美詩成發三
嘆愧我曷能企豈惟頌君賢尤當示吾子

題孝子曹鏞卷

曹君本右族乃是武惠孫孝義出天性辭貌恭而溫念
昔父早沒而獨母氏存母子守清素終鮮弟與昆窮居
力弗瞻藜藿供盤飧時有好善者有女願與婚既以承
祭祀復茲奉晨昏奈何頗成立母老病且瘡迎醫及禱
祈徒然自趨奔母病日已劇惻惻心憂煩於焉割其股
調和煮成饌一啜病即愈依然對庭萱後來病屢作夫
婦相與言再三至刲肝聞者驚心魂老天念其誠遂使

母子完曾從視其傷肌膚尚留痕母壽盡天年此心可
無冤至今問其故對客聲猶吞嗟哉孝子心勇為過孟
賁殺身以成仁況茲罔極恩唯知母所重此身何暇論
世多不情子貶議爭囂喧聖朝崇孝治特為旌其門豈
徒事獎勵要使薄俗敦吾知孝義名千古留乾坤

閒居與沈修撰小酌寫枯木竹石遂題

我本山澤臞棲身伴樵漁謬承翰墨選布衣登石渠朝
野孰云異依然樂閒居地位近清禁事罕人迹疎遂令

公宇中乃若幽人廬苔蘚上堦砌竹樹羅前除匪惟宜
壺觴況茲有琴書文會不待速朝夕與之俱俯仰皆自
適此樂將焉如

題耕讀軒

出處既莫同趣舍亦云異君子適其宜窮達歸一致世
榮吾豈薄先業非可棄復恐素心違蹇跡同顛躓耕田
食吾力讀書樂吾志欣欣一家親朝夕寡憂慮俯仰苟
自得外慕奚足嗜鹿門非求安南陽豈忘世古人不可

見唯將古心契

過沈修撰留酌醉後書贈

旅跡無可往兀然生隱憂素性本簡拙出門寡綢繆感
君獨知己情真久交遊況茲相近居來往常遲留笑談
散堙鬱杯酒屢勸酬供具即所有無煩備時羞陶然各
盡醉不忤亦不求人生契合難數造君毋尤

題畫

芳春始云邁倏忽驚素秋志業獨未就歲月不我留羈

懷渺難托寫此林塘幽喬木陰苔逕孤亭俯清流悠然
故園想詎敢為身謀含情委豪素庶或宜神遊

雨中過歐陽編修館題竹木畫上

我生本寂莫況茲久羈旅偶君素心人來往迭賓主秋
聲動高樹暝色渺烟渚孤館坐題詩蕭蕭正風雨

題松鶴軒

吾宗有令弟所志樂夷簡載筆遊兩京襟抱常坦坦自
言外祖翁素不治資產平生有斫田耕穫同渭漚揮毫

擬義獻伯仲固無赧前朝雖薄宦名士交無限所居有
長松蔚蔚張羽繖上有雙白鶴對之怡歲晚吳興趙公
予書價重圭瓚為寫松鶴軒竊翫龍蛇綰翁今久仙去
往事不可挽軒居成丘墟軒扁獨遺版青松未化石白
鶴去不返追昔成夢寐令人淚長潛求君為寫圖庶或
哀可剋君當憫其情不敢數催僭我亦重其請不敢辭
以嬾欣然為一揮庭宇已蕭散須臾點染成高致如在
眼急須潤吾筆沽酒奉杯琰九原如可作翁亦笑而莞

為徐學正曦叔寄題其尊翁晚香卷

徐君素高尚雅志難適俗慕彼柴桑翁種此籬下菊黃
花秋正繁白酒時一漉一觴聊獨傾三嗅仰餘馥有兒
抱遺經典教濂溪曲迎養固靡遑時奉千里祿較之五
男兒此時亦已足何當結比隣歲晚相往復

寫畫題贈蘇性初歸吳

復號宜閑

我家住錫麓君家住吳城相去百里近一日孤帆程君
才日方茂我鬢日已白相逢一笑間共作京華客君今

忽歸去別我將晨征懷哉舊猿鶴寫此丘壑情丘壑不可戀宜奮青雲志長安三月春沽酒待君至

五月蒙賜衣五端

自知素蹇劣謬忝列近侍孰云載筆勤清禁日無事聖心念長夏恩以絺綌賜感激既盈襟持歸復滿笥光榮動隣曲喜色見僮婢服之固難忘無補獨深愧

偶成題畫

玉署坐涼思野人忝簪纓謬以染翰職遂得陪羣英疎

雨澹東旭嘉樹陰西清樂茲館閣靜悠然抱閒情於焉
弄豪素澗谷紛縱橫幽逕遵曲岸鳴泉遶孤亭同游固
未暇寓目猶可并菲才惜何補生幸承休明

獨善堂為施惟政賦

窮達雖不同在我固無異獨善與兼善此道一而二施
君素高尚衡陽久藏器雖曾佐花縣牛刀聊小試未幾
即歸休自謂猶未至築堂南面嶽相高爭氣勢講道通
天人讀書飽經濟遲當達天朝揄揚明至治不見有莘

士躬耕豈忘世幡然一旦起惠澤蒼生被君今已白頭
明時幸遭值願言發其蘊青雲奮高志勿效棲棲人林
居事幽致

永嘉勝概卷為黃太守賦

永嘉古名郡山水足清賞王謝舊登歷境在人已往遺
躅不可攀千載徒追仰黃侯來牧守政暇愛西爽邀人
繪成圖歷歷如在掌嵐光樹蒼翠海氣天沆泔松塢出
禪宮花汀隱漁榜桑麻接屋青機杼連村響樓臺俯崇

墉阡陌遍膏壤彷彿行春時笙歌散輪鞅慙余謬通籍
染翰近天仗披圖諒難即神遊起遐想

題畫贈李醫士士文

養痾坐虛館何繇制頽齡藥物固所賴奈此白髮生據
梧聊自適褰幔當前楹涼風颯已至庭柯落秋聲天空
暮雲遠日落遙山橫攄懷託豪素悠悠塵外情卷之聊
遺君非敢侔報瓊

平易齋為李先輩

李君素聞道襟抱常坦夷富貴與貧賤此志終不移蕭然一室中和氣藹春熙歷險思詭遇校之孰為宜

重過劉竹深孟功

敏

昨朝復今晨造君何其頻我來適我暇君喜良不嗔語言有餘味所樂皆天真都城十萬家澹泊情偏親

臘日梁修撰用之以還家初散紫宸朝七字為韻

命賦七首

大化無停機寒暑如循環歲華忽云暮陽和亦已還人

生百年內憂喜互相關顧匪金石姿安得長朱顏達人
會斯理意與雲俱閒聞道愧獨晚衰也吾何歎

右還字

憶我童稚時鄉儻競喧譁自從別鄉縣歲歲天之涯俯
仰能幾時兩鬢忽已華今年在京國臘蟻汎流霞酖顏
發高詠悠悠興何賒皇風無遠邇四海同一家

右家字

寒旭上東觀殘雪明石渠嘉平錫華宴曉入承明廬珮
珂肅西清韶音聞笙竽自顧草木同澤被仁風噓孰知
四序周正茲萬物初報國乏經濟白首徒嗟吁

右初字

八蜡聞古禮臘日在茲旦迎祭思報勞貓虎禦田患鑾
輿幸郊原校獵旌旗燦獲禽足練武震蕩妖氛散上以
共乾豆下以具賓饌時雍年穀豐河海永清宴

右散字

十五初志學性頗嗜經史謀生計已疎豈復親耒耜自
期德業成拾芥取青紫中季遂蹉跎五十始從仕扈從
遊兩京伏臘已三祀寸勞不能効竊祿抱深恥

右紫字

瑤花已三白臘戌當茲農田家願豐稔對此尤欣欣歲
功已云畢斗酒敘比隣共言足公賦擊壤同堯民慚予

不耕者承乏侍紫宸素餐不見斥惟應仰皇仁

右宸字

我本山澤民浪跡隨漁樵豈意蒙齒錄置身事清朝矧
居翰林場交好皆英僚歲時遇伏臘詩酒常見招壯懷
固浩浩白髮何蕭蕭醉來目雲漢寂默神彌超

右朝字

送炯竺庵之寧波都綱

師本學佛徒而我忝從仕儒墨雖不同宗教各鳴世沂
流求其原要亦無二致皇朝設僧司統屬官府例自非
名勝流此職良不易師今預茲選領命辭丹陛都城雪

初晴越水春將媚齋餘只翻經公退但哦偈難忘北闕
心廣演西乾意慚余老無成素餐糜廩餼終當效季真
共結方外契

為游伯瓊題靜觀卷

羣動日擾擾何由止囂煩我心一以靜庶或澄其源天
高四山寂日落孤雲騫至理無不在朝市同丘園君應
領斯妙吾亦忘吾言

贈友

君家住蘇城我家居錫縣鄉里舊知名都門才識面君
當職莞庫我辛勤筆硯退公無所為得暇輒相見清玩
常命觀芳樽屢叨讌交情尚平易世務摠諳練處靜惟
端莊遇劇即通變歎羨徒爾嘉懷慚未能薦適茲代者
至復預天官選誰言九霄長獨快六翮健扶搖良可期
惟恐迹相遠

送松溪宰周景辰調連城

君從松溪來又復連城去官遊若萍蓬流轉那能住百

年多遠別握手幾惟遇況茲當暮齡幽抱復難愬都門
一杯酒回首知何處天南與天北相思渺雲樹

病起寫山水圖謝張逢吉先生

少小時調攝動或違天和迨茲晚年至疾疢宜其多所
念竊美祿置身在鑿坡寸效未及施報國將如何張君
負奇術垂情屢見過爰以慰微志匪徒起沈疴日來力
漸完稍能眄庭柯殷勤理冠屨載振朝天珂感德曷云
喻銘心久難磨揮毫寫山水持奉志靡他山以崇令德

水以衍後波

題畫

衡門掩秋色苔徑淨無塵人跡雖罕至簡編良可親修
篁度涼颼高梧落繁陰時應散幽寂采藥過中林

為王彥本題樂善堂

萬類既莫齊人生有賢愚所趨各異向所樂亦已殊仰
惟古聖哲動與道誼俱窮巷雖飲水寸心常有餘咄彼
夸毘人多貪竟忘劬苟得適暫欣旋踵即憂虞吾宗有

佳士近寓都城居形迹隱廛市心志在詩書生業惟足
用何嘗逞豐腴有妻主中饋有子從師儒老老復幼幼
一家常宴如我適扈蹕來相延過其廬新酒初潑醅時
羞問園蔬維時春正好芝蘭滿階除累觴不知醉賓主
情怡愉譜牒未暇論亦足敘友于高堂扁樂善此語良
不虛酒闌袖出卷辭章揖我須我惟三槐澤今尚蒙沾
濡後裔能不墜其亦在子歟願言崇令德始終永無渝

贈胡都給事中

梁洪武庚辰進士少傅兼太子太傅禮部尚書卒年八十九贈太保諡忠安

都給事中胡君源潔文雅清慎志趣高朗與予
有同郡之好嘗自大江而上岷蜀繇關陝至於
中原凡名山古蹟之間履無不至今年邂逅北
京同宿寓所因得扣其登覽之勝聞見之廣不
覺令人鄙吝頓消而神爽飛越也遂賦詩美之
皎皎瑤臺鶴濯濯冰霜姿宿昔有仙契於焉慕安期翱
翔歷蓬瀛飲啄來上池寸丹久已就八表隨所之靜與
元氣并動與祥飈馳罔象莫可測玄珠應自知乃令難

驚羣矯首徒嗟咨

寄贈任給事中

時在武當山中

君本霄漢客降謫留人間人間不可住又復遊名山彩霞絢春衣瑤草腴朝餐高風邈難及悵悵心所攀

和曾侍講古意

樂字子啓永樂甲申狀元

靡靡風外花濯濯路傍柳盈盈馬上姝皎皎出素手揮鞭度南陌行人盡回首芳香襲和風皓綵奪目久轉盼睹他人百媚自成醜孰云君子配終恐匪佳偶會合寧

不歡別離恐難守懷哉羅敷言使君婦自有

寄鄉友沈得淵

沈君非凡流宿稟尚高潔羨門注仙籍安期守真訣偶
然落人寰世味遍已閱混迹雖同塵心神乃超絕蕭然
一室內隱几常自悅時把玉簫吹翔鸞舞明月

中秋玉堂宴集分韻得霄字

素秋已云半清風滌炎歊況茲良夜月清光湛層霄玉
堂有仙侶觴詠集英寮不以殘朽遺折簡頗見招顏然

顧我影白髮何蕭蕭道同話自契意適興彌超佳章比
金石迭奏諧雲韶匪徒愜清賞所樂際昌朝沈沈漏將
曙遲遲斗轉杓良會自忘寐詎謂永茲宵

題喬柯竹石

涼風起東觀朝雨灑西清琅玕亞琪樹瑟瑟鳴秋聲
爽氣集几研逸興悠然生染翰適餘暇聊茲寫閒情殷勤
欲持贈披玩久屏營多君美無度素抱幽人貞願言勵
高節固此歲寒盟

題畫

高林俯清流小徑遵岸曲書聲松桂深知有幽人屋索
居非遯跡讀書豈干祿義理發我蒙悅懌心自足古人
已云遠古道宜自勗掩卷三嘆餘江天晚涵綠

閏九月王修撰直宅對菊分韻得喜字送其兄行
敏

故人勞遠來所念在難弟久別忽相親安能不相喜況
茲值閏九黃菊正靡靡掇英汎芳樽時羞雜陳几匪徒

敘友于簪纓集鄉里顧余忝同姓相愛蒙見齒意洽形
俱忘秩秩循有禮既夕復秉燭醵詠情難已天倫固云
樂文會尤足美明河轉虛簷零露襲華綺衆賓雖已散
遲留獨未起明發理歸橈離憂復茲始

暮上呂梁洪

黃河從西來萬里走濁渾呂梁乃故道勢若逸馬奔我
來趨王程至此日已昏挽夫識予意駕牛乘夜喧灘回
石亂關水與船相吞攀援一失勢轉眼不可存巨纜雖

云牢懷畏時自捫須臾際安流稍覺寧心魂因之勞其
勤斗米代雙樽汝勞勿復道吾儕賴君恩

夢兩兒

兩兒別來久累夜夢何頻得非我念兒無乃兒憶
親夢中宛如昔田廬荒且貧猶能具雞黍為父招
比鄰覺來尚征途渺然萬里身歸期固難必歸夢諒
非真願言各努力進善光前人忠君我自勉孝悌兒
當勤

題徐訓導廷獻魁山舊隱

人品如瞻斗山名合應魁地靈知孕秀天賦肯淹才筆
陣驚同列文光燭上台高攀蟾窟桂勇躍禹門雷已作
鷗鵬化空令猿鶴猜經橫芹泮靜琴弄杏花開宦志雲
霄待鄉心歲月催黃殘松逕菊綠遍石田苔若便尋歸
駕移文恐勸迴

呈太常少卿高先生

禮樂推三代文章似六經應時明出處當世仰儀刑賈

誼趨宣室桓榮表漢廷青雲登棘位皓月映槐廳大筆
頻追謚豐碑屢作銘祝釐迎茂祉贊祀答穹靈聖主加
榮寵儒林慕德馨聲名騰宇宙黼黻佐朝廷小子成樗
散明公耀德星朽材難切磋鈍刃冀摩礪得照青藜火
甘為白澤釘高山恒仰止鄙業久荒寧詎敢思推輓何
繇乞建瓴鮒魚愁旱轍籠鳥羨秋冥未許升堂室深懷
捧戶扃可憐昏瞶久欣覩鳳凰翎

送趙僉事之福建任

鸞棲淹枳棘鶚薦出風塵重寄藩維任榮遷耳目臣拜
恩辭北闕僉憲入南閩驛路梅含笑都亭柳帶顰馬行
吳地曉帆度浙江春廳宇榕花合園林荔子新好山供
日詠列郡待時巡本在糾彈職宜加撫育仁威聲銷墨
吏疾苦拯黎民佇聽廉明譽君無讓古人

上邑宰韓相公三十韻

約字博文東河人號清軒累官保定知府

朝廷分郡邑守令職羣英列宿郎官象親民父母情學
能知大體志在不虛聲廉介寒冰潔襟懷夜月明牛刀

纔小試驥足暫淹程木鐸來東魯絃歌亞武城下堂延
德齒分俸給孤乳待吏如奴僕同官若弟兄得人無不
舉守節盡皆旌厚俗行鄉飲矜農緩賦征薄徭猶念重
疑罪必從輕懦弱皆能立豪強莫敢撓便期銷獄訟何
必事笞榜退食親琴瑟橫經難友生禮儀全考古動靜
一於誠鬼泣淫祠毀神歆正典行黷宮登俊乂壇社潔
牢牲蝗旱隨時雨陰霾不日晴野人多頌德朝士素知
名百廢咸興葺羣黎享太平市廛泉湧貨郊墅屋連甍

煙草人間牧花村犬不驚酒有懽伏臘溫飽樂蠶耕獨
嘆還家客嘗為守塞兵病軀來絕域悲涕省先塋牢落
傷弓鳥漂流汎海萍無因舒羽翼徒切羨鯢鯨燕石終
身誤吳絲上髻紫年華留莫挽志業苦無成安得除邊
籍相容列下氓

題蘭蕙軒

武林陳仲和二
子德中景中


陳氏好兄弟宛如蘭蕙姿幽馨殊可愛雅操不求知但
自栽培好何妨采佩遲叢深滋雨露茁長滿階墀芳澤

傳先世香名達盛時和風同一室相對兩怡怡

送祖人韶石住惠山

諱懷祖真性海之弟子

故鄉人到喜況是故鄉僧
寓館纔相見歸途又欲登
杯浮辭建業鐘動下蘭陵
新領禪宮席單傳祖派燈
性圓滄海月行潔玉壺冰
舊社高風振名泉勝槩增
別情江渺渺鄉思樹層層
憑語烟霞侶塵緣稅未能



王舍人詩集卷一

欽定四庫全書

集部

王舍人詩集卷二

詳校官國子監司業_臣納麟寶

中書_臣劉源溥覆勘

總校官編修_臣王燕緒

校對官典簿_臣郭祚臧

謄錄監生_臣楊其梓

欽定四庫全書

王舍人詩集卷二

明 王綬 撰

過華叔端草堂寫晴雨竹壁上

諱恪號賓暘
卒年七十七

我愛君家遠城郭繞簷竹色侵簾幙
醉中揮翰寫晴梢
湘雲一剪春陰薄
看來頓覺風氣清
耳邊恍若聞秋聲
嘯歌到晚不歸去
高卧翠陰呼月明

高軒置酒延夕曛
眼前知己無如君
枯腸醉後有芒角
手揮高節凌青雲
圖成自覺精靈聚
素壁俄然儀鳳羽

擬得秋聲直造來剪燭連床聽風雨

溪山烟雨圖為包公愷寫

溪山茆屋知何處隔岸青山暗烟樹一棹誰兮路欲迷
緣流似逐桃花去嗟予落寞江海濱到今懶欲問通津
因君扇底塗狂墨煙雨蒼茫一片春

為宣指揮題枯木竹石

修竹娟娟淨如洗古木槎牙半空倚莫嫌怪石長蒼苔
當年曾中將軍矢將軍年少多奇勲平生意氣凌秋雲

他年太史書勲業汗簡須當用此君

吳姬留客行

吳姬年少纔十六能抱琵琶唱新曲愁連山黛鎖青蛾
汗透霞綃濕香玉問郎今去宿誰家郎須聽妾彈琵琶
吳城有酒不肯住巴姬未必顏如花遲留那得情相與
芳心一一絃中語空江霜落叫征鴻孤棹風高響秋雨
須臾彷彿臨三湘切切哀猿堪斷腸巫陽雲暗楚臺曉
故山不見闕山長彈到悲笳少三拍郎心欲去何匆迫

挽卽不住卽過船滿江月色秋潮白

題枯木修篁圖

老幹昂霄幾千丈天籟時聞夜聲響一竿修竹共蕭森
復托絲蘿半空上寒姿久抱幽人貞良材孰肯摧為薪
摠令匠氏未相遇故山風雨年年春

早行索水

鷄鳴晨炊戒輪鞅閉門一點明星上路出長林不見人
煙深咿軛車聲響須臾日出氣象分往來行旅纔紛紜

僕夫笑指都城近宮殿岩窺五色雲

為楮府高先生賦牧雲歌

我聞黃初平牧石驚其兄至今山中石尚作羝羊形又
聞蘇子卿風雪牧北庭辛勤十九年猶持漢家旌未聞
牧雲誰氏子牧雲自號逃其名雲中所牧竟何物以雲
為牧何所憑比之牧石仙猶乃繫塵纓意為牧雲人足
不到邊城但見長裾曳侯第傍人指是侯門英靜中默
與元氣會雄談四座風雷驚端倪變化竟莫測顯晦孰

可知其情得非當年豢龍氏馴致神物驅幽靈豐隆施
鞭掣明電天吳出浪翻滄溟厥術乃至是厥德良可稱
吾將薦之達天府遊帝廷好施霖雨蘇蒼生嗚呼好
施霖雨蘇蒼生

題張縣丞凝翠軒卷

張君結廬修竹裏一榻清風淨如洗幾番過雨看新晴
簾捲春陰落烏几自從作官今未迴家僮日掃林間苔
何當直造遂吟嘯不問主人毋見猜

少婦行

東家少婦年十五嫁得良人出為賈經年書到不言歸
肯念春閨別離苦西隣年少猶空房紅纓白馬羽林郎
眼傳芳意已相密願作雙棲鴛與鴛朝聞賈死驚未訃
暮奔已作西家婦六親蒙恥無光輝方逞妖淫濃態度
懼情得遂無幾時羽林從征須別離欲去翻思疇昔事
叮嚀恐亦還家遲妾言勸郎即勿疑妾今貞守無他為
可憐婦道真能盡去後郎心肯全信

為夏叔度寫葡萄子雪洲之上因賦叙別

我生負氣尤好竒襟懷抑塞蟠蛟螭屢遭屈折莫我知
向人委順長低垂倘爾逢君雪洲上酌我涼州寄來釀
醉傾墨汁為君塗一吐胃中氣千丈維時雨歇涼風生
薄陰零亂縱復橫蟄龍蛻骨冷雲濕驪珠出海秋蟾明
坐間觀者皆驚訝何繇寶帳人間掛恐令癡眼起貪心
主者收藏始知畫知我如君能有幾此術聊將遊戲耳
白鷗湖海一身輕長揖謝君吾去矣

題青山白雲圖

我曾九龍山下住結廬正在雲深處
日日看山還看雲
長教剪却當簷樹無端一別猿鶴羣
馬蹄南北徒紛紜
塵途底事拂衣晚迴頭愧負山中雲

贈竹隱

君家遶屋多修竹簷外時聞響寒玉
雨歇林窓風日妍
春陰一榻侵衣綠閉戶常令俗駕迴
從教三逕長蒼苔
予今亦有王猷癖直造休嫌數往來

倭扇謠

倭人繭紙摺為扇缺月生輝銀滿面闕下年年多貢
餘都人重購何紛如杭工巧黠思爭利效倭為扇渾無
異價廉百十人不慊說是倭來方道地倭來道便經杭
州廉價却將杭扇收倭收杭扇堪驚怪轉眼街頭高價
賣買扇還家誇扇真街頭持賣真倭人

倭人繭紙摺為扇缺月生輝銀滿面闕下年年多貢
餘都人重購何紛如倭言我扇不欲利只欲人間古銅

器器好年多扇亦多猶解摩挲看歎識倭能論器不論
財尊壘彝鼎填街來幾人懷金不得扇手中無器空徘徊
吁嗟古器日應少倭貢年年扇來好

送醫士張孟經歸華亭

張君深得活人理白髮蕭騷垂兩耳顏面如童步若飛
自說平生能服餌京都賣藥三載餘簾垂一榻廬中
居榮名利祿不掛口向人只講岐黃書曾聞舊業松陵
曲井曰依然隣二陸鱸肥秋浦蓴正香虎卧芳林杏初

熟今年忽復思東歸海門一葉春帆飛到家尊酒作良
會當時耆舊今應稀都門柳花飛白雪欲折長條贈君
別不知此去幾時來我亦相從問丹訣

送潘知縣之餘干

潘郎年少才力強筆端五色成文章新承寵擢宰山
縣送別都門春酒店君今與我交雖淺志業人生宜自
勉此日牛刀聊試為他時驥足應須展千里江帆一帶
斜餘干地沃多桑麻時清自喜少徭役琴弄春風滿縣

花

送傅子晦教授之興化

扁舟欲別之何處一官典教閩中去
細雨榕陰面面山
薰風荔子家家樹
憐君年少非常倫
才膽人稱席上珍
蟹館講餘清晝永
玉琴閒弄杏壇春

贈朱編修

朱君乃是青雲器
讀書不負平生志
向曾龍躍禹門雷
跳浪翻空應得意
聲名藉藉動京華
策對明廷衆所

誇鰲首已攀蟾窟桂馬頭還看鳳城花斯文仰羨增光
顯稱述猶存贈行卷鏗鏘金石韻相宣遠大期君意非
淺君今寵擢登鑾坡玉樹花深響珮珂五色文章成黼
黻九天光采動星河嗟予久已聞英譽勢比雲泥固難
會年年枯死案頭螢四十無聞何足畏不期邂逅同
清朝非才未免旁人嘲癡蠅附驥亦致遠托身願結青
雲交

輓徐母

平生嫠居冰雪清教子讀書名已成正期祿養體長健
俄聞凶訃人皆驚柳楊青青楊子渡江山依舊來時路
春風丹旌引歸航遺骸並葬良人墓

題漁樂圖

遙遙雨歇明殘霞涼風颯颯吹蒹葭晚來隨處可棲泊
五湖煙水皆吾家得魚且覓津橋酒旋採溪毛雜菱藕
除著沙鷗孰可親隔蓬喚取隣船叟生計年年一葉舟
全家不識別離愁婦能斫鱸兒行蓋一笛橫吹萬頃秋

為袁將軍題梅軒卷

我家舊業梁溪濱雪晴溪上梅花新
瓊林皎皎映書屋天然富貴誰言貧
花時倍覺多賓友經月勞勞事詩酒
滿座香風半醉時一簾皓月微吟後
自從承薦遊京鄉十載看花白玉堂
貞操久應心似鐵風流其奈髩成霜
今年扈從來幽薊撲面緇塵滿衣袂
欲覓梅花杳莫聞江南驛使憑誰寄
春到都城十萬家管絃處處聲嘔啞
不識冰姿尚清素只知豔質爭繁華
朝來雪花如手

大興來不管貂裘破蹇驢鞭策訪袁安不似當時閉門
卧弓矢森嚴櫪馬喧羽林期獵窮郊原見予一笑不復
出呼酒且共登梅軒未始栽梅向軒下高扁梅軒衆驚
訝自說平生極愛梅此地無梅僅堪畫畫師乃是錢塘
人西湖久與逋仙隣曾作烏臺鐵面使筆端解寫梅花
真嗟余久抱梅花思感戀君恩忘歸計畫中纔見即
相親分明一段家山意慘淡枝頭雪未乾灑然清氣逼
人寒君今與我心相合莫厭敲門數借看

題中條舊業圖卷為王士烈大尹

中條之山何雄哉層峯疊嶂高崔巍太行嵩少與之相
脈絡禹門鑿斷迴向中天開下有黃河水奮激聲如雷
波濤萬里接銀漢到此曲折其勢相縈迴佳氣日磅礴
孕秀多奇材寶藏百物不足貴徃徃間出人中魁不見
巖下士版築將終身寧知一旦叶夢出大施霖雨康斯
民唐有裴中立平淮之功誰可及宋有司馬光文章事
業何煌煌至今行人過關里景仰式車臨路旁吾宗有

兄王士烈世向山中營舊業數頃良田萬卷書父祖傳
來今幾葉父祖唯積善素無功名心到君尤加學問力
長年閉戶松桂林九經百氏貫乎一律歷地理俱精深
鶴書遠召來相尋小試百里彈鳴琴岐麥疑疑桑陰陰
黃童白叟皆謳吟近歲皇家事陵寢北京山水明如
錦葬師不下數百人取驗求真口皆噤郭璞之術君所
閑天下山川指掌間漢唐陵寢考分寸琅琅一奏開
天顏天顏悅懌恩加厚太官供羊光祿酒崛起長陵北

山阜有詔封山號天壽海晏河清億萬年知君名與茲
山久君今遷擢居帝都駿馬蹴踏有雲途聖明在
上不可辜隨時正好陳嘉謨勿作尋常淺丈夫區區懷
土胡為乎傳說諸君久已往空山猿鶴空相呼白雲紅
樹秋糝糊為君寫作中條圖古今志山同一符君當解
衣為我沽會須一飲傾百壺醉後與爾歌嗚嗚唾壺擊折
青珊瑚中條佳氣無時無嗚呼中條佳氣無時無

月夜舟中酒後寫呈胡祭酒兼同行諸公

官船沂河明月夜千里河流金液瀉水拍船窓月在天
月色波光兩相射此時清興不可遏須待傾觴共陶寫
行庖美味雖云重更覓溪鮮問漁舍鱗螯初肥良足珍
霜餘梨棗甘於蔗同行況復皆賢豪襟懷豈是尋常者
胡公一代大司成文章聲譽追班馬延陵給事錢塘客
每出新詩儼風雅東陽兄弟居翰林一雙白壁千金價
林黃二子才更奇往往辭氣凌鮑謝雲間尤喜紫陽孫
筆底龍蛇衆驚詫一時會合非偶然共沐恩光來日

下霏霏珠玉動生風濟濟衣冠儼成畫嗟予年少嘗好
遊臨水登山日無暇時當有月達旦飲典衣肯顧山妻
罵年來老病不復飲每見深杯輒生怕不知今夕是何
夕狂態依然莫能罷酒闌興盡不復散共向船窓相枕
籍須臾月落水自流斗柄低回柁樓掛騎鯨李白遠莫
攀夢鶴坡翁久仙化人生所貴在適意塵慮何須苦縈
星燈前漫爾寫長謠留向他年作佳話

題竹送周以莊之長清宰

故人別久纔相見又拜恩光宰花縣去思匆匆不我
留都門沽酒徒攀餞我有五色之彩翰為君寫作青琅
玕虛心慣承雨露重高節豈畏冰霜寒此意贈君君達
否清風雅擦君皆有君到長清轉覺清不須更種陶潛
柳

題竹寄長清胡判簿仲文

胡君個儻情見真昔曾同客京華塵一官去作長清簿
吏民懷惠如陽春別來不覺經年久愧我蹉跎空白首

為寫清風慰遠思殷勤致問平安否

題劉給事中畫

獨立空山不知老崖石相依共相保月影秋清舞瘦蛟
風聲夜半驚棲鳥錯節盤根怪且奇古翠滿身苔蘚滋
匠石自知難入眼年年春雨長孫枝

題師將軍壽椿堂

我聞南華老仙所談之靈椿長年度世殊可人爾來萬
有八千歲方乃一秋兼一春桓桓師將軍忠孝孰可倫

緬思此椿壽將以奉嚴君嚴君乃是先皇之虎臣英
姿雄畧如有神起家昔住荆溪濱曾同周處為比隣惟
將三尺劍掃淨六合塵先皇騎龍上蒼旻攀髯不及
空逡巡至今心尚赤其奈髮如銀將軍襲爵尤忠勤遠
持節鉞鎮八閩列鼎之養何足珍惟思種椿構堂怡其
親君不見椿枝長茂椿葉重堂前人對椿陰濃靈根盤
結托厚地高柯直上摩蒼穹蟠桃見之猶屈膝喬松並
之應歛容況並顰耆楊柳低頭榕世間凡木莫與同嗚

呼世間凡木莫與同唯孔明廟前之老栢千古可與相
爭雄

聚玉堂為吳主簿賦

君家子弟追王謝玉樹森森滿庭下器美難容韞櫝藏
才高應得連城價堂前見客溫相和德業尤宜更琢磨
遲看懷寶聯班出南陌珊珊響珮珂

題北堂春晝卷

堂下萱花照人目堂中阿母顏如玉寸心難以荅春暉

手綫尚存遊子服
遊子白雲空復情
年來從宦留神
京他時得請當歸省
閭里應看畫錦榮

題徐進士峴山讀書卷

徐君結茆雙峴峴
峴峴白雲掩護青
林中十年閉戶不肯出
讀書捲幔來松風
一朝射策黃金殿
青霄萬里鷗鵬變
躍馬晴看紫陌花
鳴珂曉入瓊林宴
只今祿食居京華
藉藉香名衆所誇
不獨身霑新雨露
且能光賁舊烟霞
愧我萍踪遍江海
百事無成髻容改
數卷殘書久已忘

舊物惟留短檠在年來感荷君恩優日令揮翰居瀛
洲姓名自謂登仙籍人笑馮唐已白頭

題黃庶子瑞菊軒卷

淮字宗豫

紫陌朝回鳳城曉羅衫冷怯霜風早軒前佳菊吐奇花
合萼連葩向人好陽光一照色更鮮盈盈兩臉胭脂妍
同心可比連理木清香絕勝雙頭蓮簪纓列坐皆僚友
嘖嘖看來嘆希有宜將綵筆寫新圖持歸遠為雙親壽
繇來種德生賢郎家庭晚景何輝光綵綸日掌侍清禁

阿閣五雲儀鳳物因人瑞皆從類人今況與明時會
乃知聖主得賢臣茲花亦是皇家瑞

送永嘉趙惟善之北京司倉

趙司倉初辭闕一鞭遠冒燕山雪燕山雪滿河水結
酸風刮面肌欲裂長安沽酒與君別酒酣不覺雙耳熱
嗚嗚作歌歌激烈煩君為我同擊節試看昭王臺黃金
致英傑黃金散盡臺已空至今士氣何曾歇幸並際昌
期沈淪盡超越班資正為賢才設況君年壯才更哲鵬

化南滇十萬程君今始上青雲轍肯為兒女情臨岐動
悽切丈夫要使心如鐵江南梅花為君折路長勿使音
書絕兩地相思共明月

題畫魚

上池生綠水初泮暖逼小桃紅欲半纖鱗猶得泳恩波
何異鯤鯨運溟瀚變化逢時底用媒相忘蘋藻且徘徊
為龍聞說勞行雨祗恐禹門雷電催

送張知縣邦達

我初長安識君面四十才華正強健北海雲鵬翅欲張
南山霧豹文初變自言來京已三載足跡勞勞半郵傳
東浮浙水駕風濤西上蒼梧躡雲巘懷中無復茂才金
身上空餘慈母線別去無何忽相報近得高閑適安便
乃知優給有庠序擇師教育君膺選絳帳三間坐百人
青衿一字數千遍三畧纔過又六韜終日吾伊不知倦
吁嗟天意諒有在在美如平豈貧賤今年詔下大搜
賢公論推君當鶚薦扶搖直上試天官一策數陳雲錦

絢賞音不獨主司驚嘖嘖旁觀盡稱善綠綬初垂何所
之獨向炎方宰花縣炎方近年無瘴癘民物安然樂豐
羨遠徼尤宜寬政施皇恩有待仁風扇此行所重民
社寄臨別肯為兒女戀秦淮弱柳垂青青折取長條共
攀餞沙口帆移燕語留花前酒續鶯聲勸明朝應度嶺
頭雲千里相思一回睽遲子三年政績成還來此地重
相見意故曾為馬援珠歸囊肯帶包公硯驥足應知難
久淹嘉聲又達明光殿

題王將軍梅雪軒

襄陽耆舊孟浩然雪中騎驢聳吟肩西湖處士林逋仙
梅邊引鶴烏帽偏二子寒酸無所托遂與梅雪同清妍
將軍執銳常披堅奇勲要使彝鼎鐫雖蒙優擢入衛尉
可容梅雪相留連我知將軍非泥此朝市乃欲如林泉
況今四海同一天無勞萬里橫戈鋌雅歌投壺分內事
孰謂梅雪非我便種梅五六株構軒數十椽花時雪霽
江月圓香影滿庭冰玉鮮時時退直得清暇開軒命客

烹肥羶從教曲奏譙樓角任取寒生玉帳瓊梅以供鼎
實雪以呈豐年上祝天子萬萬歲歲陽春生意全
乃知將軍愛梅雪寒酸之士正爾霄壤懸

題襟襖軒為夏叔敏賦

號東臯無子外
孫張廷宗繼祀

長年耕鑿東臯阿結得草軒如草蓑栖身僅足蔽風雨
抱膝猶能發詠歌窓外鳩鳴花霧重門前犢卧柳陰多
嗟予久作京華客未得歸田奈爾何

送深上人湛然遊方

我生憶當年少時清狂縱逸誰能羈杖頭百錢一壺酒
布襪青鞋隨所之不肯低頭學干謁每向名山訪幽絕
片帆晴度淞江濤足馬寒衝薊門雪黃河西來一帶橫
岷江東下連滄溟望中惟覺隘寰宇物外尚欲登蓬瀛
年來潦倒渾無用疾氣攻身常隱痛稍因休暇輒欲眠
並舍相呼嬾行動矧並感荷君恩深優容散逸居詞
林私懷固有尋山約激切難忘戀闕心雲水烟霞應
宿好靜自尋思還自笑至今天姥與匡廬清夜猶能夢

中到深師乃是學佛人與予似有三生因嶺上孤雲久
為伴天涯片月長隨身清容磊落蒼厓古破衲爛斑雜
繒補不惟潭底解降龍纔遇山深即馴虎初從雲中登
五臺淮流杯渡江雲開少林長蘆雖古刹叢林須向京
都來京都諸山遍遊矚猶能過我蓬菴宿對榻聽殘上
苑鐘論詩剪盡西窓燭相看身世總忘機水自潺潺雲
自飛師利遠尋居士室大顛留却使君衣無心偶爾欣
相遇又復飄然拂衣去問師此去遊何方多半名山我

遊處大江南北，浙東西是處堪行路，不迷試覓名山最
奇處，石間多有我留題。

送梅知府之廉州

廉州作宰六載餘，懸知撫字常勤劬。土風自古少耕稼，
民業至今多採珠。歸路惟迎竹為馬，公庭示辱施鞭蒲。
他年太史論循吏，惠政應推君最殊。

過梅花堂

我曾泊棹西湖濱，千樹萬樹梅花春。孤山月照一蓬雪，

十里湖光如爛銀，興豪對客酣清醺。
達旦賡吟騁雄健，燈前索紙呵手題霜兔。
鏐鏐冰滿硯，年來浪迹隨西東。
看花多在驅馳中，縱有香醪對明月。
渾無好興酬春風，只今書劍來京國。
欲訪梅花杳難得，亭館多栽逞豔姿。
山林誰重凌寒色，春來未幾薄雪餘。
寒驢偶過西城隅，疎花寂歷三五樹。
中有一室幽人居室中，幽人廣平後。
旅寓看花為花瘦，窻橫古影神愈清。
盃吸寒香骨應透，相逢休言一事無。
隣家有酒須賸沽，趁取樓頭未吹角。

莫教地上魚鱗鋪我因看花狂興發花應笑我生華髮
曲逆長貧豈足論馮唐已老誰能拔憐君與我同襟期
看花酌酒情相宜百年一任世所棄寸心獨許花相知
我家君家隔江浙一水相通吳與越此夕何如對榻眠
夢魂還醉西湖月

長詩一章美韓侯也侯宰無錫多善政復以捍禦
有功遂陞州守之秩行且有日鄉人王昶會予
京師能具談侯德予辱知遇尤深弗得歸預攀

轅之列敬用次第昶言賦成長詩五十韻使邑
人歌之竊比甘棠之詠云耳

有客黃昏來寓邸扣門吳語知鄉里肅容升堂再拜餘
袖出平安書一紙上言間濶苦憂思下叙寒溫詢動止
燈前鷄黍款客嘗品味無兼嗟客裏酒酣詢訪悉鄉閭
祇說韓侯政聲美自從侯初下車日務敦樸厚消浮靡
勸民衣食務農桑游食咸驅業耘耔西風阡陌涼雨晴
黍稷盈疇光疑疑日斜村巷歸牛羊霜老園林熟梨柿

每歲春秋社祭餘親率吾民行飲禮推崇有德尊高年
一一酒行躬拜跽賓主從容酬獻間觀感人人良有啓
時因公暇入庠舍左右琴書坐凭几諸生濟濟趨上堂
問難執經窮至理遂致吾鄉孝弟風敦睦變非他邑比
縱有兇頑亦革面訟庭罕見施鞭捶豈獨強梁化柔順
坐使妖魘絕淫祀寸心既正天弗違雨暘任意如頤指
事神治民各盡心實以一廉先律已處心寬仁復明恕
皎若日星清似水况復尤長捍禦功文武全才孰能擬

象緯今年示災變天兵抵關除姦宄雄師百萬纔渡淮
敗卒南奔散如蟻却來州縣事劫掠行旅道邊相枕死
頻使前時革面徒舊惡乘風亦羣起白晝揮戈肆仇殺
隘室連村遭破燬聖皇戡亂已登極如日行空正天
紀詔書馳布宣至仁此輩猖狂猶未已侯言我職當
字民塗炭吾民能坐視協謀僚寀集吏卒爰整戈矛張
弓矢奮身鼓勇當衆先盡獲渠魁磔諸市從此居民始
貼席老稚欣欣免驚徙且今無恙共相見不得我侯安

得爾事定侯來達上聞奏功特啓宸衷喜錫賚榮
頒品秩尊縣令喬遷州刺史只今催上去有期無計攀
留嗟失恃徒切甘棠去後思撫字情親恩浹髓我聞客
言興嘆嗟始信學優才可仕憶予前歲初還家舊業荒
蕪沒荆杞亦曾修刺謁侯堂一見下堦蒙倒屣謬承獎
諭勉前修不以孤寒輒相鄙邇來別侯已三載雅論洋
洋猶在耳會侯來京我入蜀彼此參商乃如是感侯知
我情更深聽客之言良有以古云卽官應列宿益信斯

言非謬矣百里民心有休戚政關令佐人臧否嗟我韓
侯能惠民政聲足與龔黃齒願言守令皆韓侯堯舜吾
民立堪俟侯當此去不再留發軔青雲自茲始客還為
我深致辭攀餞無繇身絆此山斗區區景仰情作詩頌
侯煩送似

駙馬公命寫枯木復戲題於上

歷盡冰霜甘老朽不作嬌柔效花柳夜撼風聲鳥雀驚
涼生月影蛟龍走嗟予好竒成畫圖墨痕猶帶烟模糊

寄言匠石勿相顧未必良材眼底無

寫墨葡萄

香墨濃翻研池汁眼前零落秋雲濕曾看月上海天高
水冷驪龍抱珠蟄何當釀得酒如川日醉北窓高枕眠
底羨涼州二千石題詩日寄瀛洲仙

題胡學士從叔祖母曹氏死節卷

此身所托惟良人良人云亡安用身未逐生前與偕老
宜從地下長相親事闕生死豈不大心全節義惟其仁

貞魂雖遠愈不滅銘文炳煥留堅珉

端午賜觀騎射擊毬侍醺

葵榴花開蒲艾香都城佳節逢端陽龍舟競渡不足尚
詔令禁禦開毬場毬場新開向東苑一望晴烟綠莎
軟萬馬騫騰鼓吹喧五雲繚繞旌旗展羽林年少青綸
巾秀眉豐臉如神人錦袍窄袖巧結束金鞍寶勒紅纓
新紛紜來往尤迅速馬上時看歲馬腹背挽雕弓金鏃
鳴一剪柔條碎新綠忽聞有詔命分朋毬先到手人誇

能馬蹄四合雲霧集驪珠落地蛟龍爭彩色球門不盈
尺巧中由來如破的剗然一擊電光飛平地風雲轟霹
靂不知何以能爾為人人武勇張天威鬼神變化妙莫
測此技乃知聊爾嬉聖心舉此重閱武逸不忘勞在
戎伍帑幣鮮華夾道陳馳騁許教便捷取自矜得雋意
氣麓萬夫誇羨聲喧呼撻金伐鼓助喜色共言此樂人
間無鑿與臨幸天顏喜醺賜千官醉蒲醕光祿尊開
北斗傍簫韶樂奏南薰裏微臣何幸遭盛明清光日

近多恩榮呈詩敢擬長楊賦萬歲千秋頌太平

青雲軒為項御史題

君家高軒絕塵歎知君逸氣長飄飄謝却山中白雲侶
來尋天上青雲交蛟龍相從作霖雨鵬鶚每共摩晴霄
丈夫如此真自快好將志業崇昌朝

送鍾子勤之南京復職中書

天寒幽薊漫山雪弱柳蕭條不堪折考績纔看上國
來離筵又向都亭別騎馬南征逐去塵長安紅紫正芳

春池頭諸老應相愛官喜如初寵命新

為劉竹深題雲山圖

白雲縹緲山嵯峨幽人茅屋巖澗阿玉田瑤草暖烟碧
落花流水春風和采松釀酒正堪醉掃石弄琴還自歌
何當結隣成兩叟杖藜日日頻相過

題畫

結屋千山萬山裏軒窓四面峯巒起捲幙晴招嶺上雲
烹茶夜汲巖前水二三高人同素心杖藜時復來幽林

抱琴相延坐亭上一曲雅諧山水音屋頭隙地肯相許
願作比隣共相處賸採松花釀玉醪更覓黃精劖春雨

騶虞歌

景星輝閭闔開五雲燦騶虞來嗟哉騶虞豈偶然而來
哉大化賦其德大塊成其材猊首虎軀雄見魁玄文郁
郁素質白爛然雲漢同昭回其動也不疾而速其靜也
不猛而威不肯食生物履生草虎鹿百獸日與相追隨
嗟哉騶虞必應昌期而來歸始吾皇之御極兮出於

陽翟之大野今吾皇之時巡兮又見於曹邑之林隈
實繇吾皇盛治之所致德合堯舜之無為順四序平
三台五風十雨阜民財嗟哉騶虞乃得於此時遊於帝
鄉而徘徊入靈囿近瑤臺麒麟相與角端為儕文犀
白象相參陪萬姓乃畢賀懽呼隱如雷白王心謙抑不
自聖拒而弗有尤謙撓頌聲洋洋盈八垓微臣作歌愧
菲才仰祝吾皇聖壽億萬歲德業廣大功巍巍德業
廣大功巍巍

贈醫士李士文

李君業醫兼業儒閉門著方仍著書濟生利物不求報
人多感德交稱譽常年賣藥吳門市相去吾家無百里
得興尤能日往還一幅風帆度烟水慚予薄宦久辭家
君亦移居住京華春風二月城南陌尚得相尋看杏花
送道會歸西昌

西昌羽客初朝天星冠雲帔何翩翩上界從知有官
府俗人漫說無神仙三花已聚九還畢一炁常存萬劫

先我欲攀留倏然去鶴背玉笙凌紫烟

送闕教諭

囊書拂曉辭金闕相見匆匆又相別草色初黃薊北雲
梅花漸白江南雪殷勤沽酒送君行斷鴈西風千里情
此去莫言官署冷好將經術授諸生

贈醫士鄭德中

鄭君襟抱如陽春一厘賣藥京華塵家無所蓄惟善
藥六陳之外餘皆新製成丸散及咬咀按方如法皆精

真見人抱病不得瘥痛苦有如同其身老人之老幼人
幼切近不異骨肉親不肯屑屑趨勢利不肯蔑蔑輕賤
貧一心治療忘勞辛直待病已情方伸人多感德申謝
忱鄭君笑受尤欣欣人多感德未及報再干再瀆良不
嗔吾知鄭君非常倫高誼直欲干青旻宜乎姓名傳縉
紳誰言宋清之後無其人於戲誰言宋清之後無其人
怡壽堂為張指揮賦

將軍乃是留侯孫少年好武兼好文胸懷兵甲自整整

心懷道義常存存若翁不幸早殂落獨侍慈親顏尚渥
只今綠鬢正康強賸種忘憂長自樂慈親所樂樂有子
子已成名與夫似願教世世樹功勛豈但區區奉甘旨
將軍年年海上行帆艣橫飛旗旆明糧儲豐足寇盜息
海波平帖軍民寧邇來北京偶相見禮貌雍容情繾綣
自言怡壽奉親堂願得詞章發光炫慚予才短思茫然
濡毫勉為成詩篇他年太史書青簡定著將軍忠孝全

萬木圖歌為楊庶子

榮勉
仁

君不見竇十郎靈椿丹桂何芬芳又不見三槐王子孫
世顯必可望君家萬木不可當乃知令祖種德心孔臧
樂善行義於其鄉屢嘗發廩賑饑荒一鄉之人無流亡
鄉人感德心弗忘為公種樹家山陽樹高應得千尺強
願公之身壽而康樹材應得成棟梁願公之後繁且昌
種來不知今幾霜昂霄聳壑森成行孫枝茂衍不可以
數計但見漫山亘嶺烟蒼蒼至今鄉之人蒙惠曷可量
生為室廬死棺槨隨教適用不取償皇天報應何昭彰

生君際遇當明良功名足為親顯揚兩京侍從登巖廊
職當輔導居春坊六卿劍履參翱翔林巒因之重出色
泉石自此增輝光我能為君染彩翰調玄漿寫出君家
之萬木混融元氣搜冥茫蛟龍騫舉靄雲霧鳳凰飛舞
鳴琳琅須臾展掛君之堂祥風佳氣來四傍請君勿異
吾言狂等閒莫作圖畫張君恩先德寓於此儼然如
在其洋洋君當掃地更焚香瞻對載拜什襲藏子孫百
世存羹牆奇材大用殊未央嗚呼奇材大用殊未央

王舍人詩集卷二